

Vedlegg til kongelig resolusjon 13. februar 2026 Forskrift om vern av Dalsfjorden marine verneområde

Forskrift om vern av Dalsfjorden marine verneområde i Sunnfjord, Fjaler og Askvoll kommunar, Vestland

Fastsett ved kgl.res. 13. februar 2026 med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34, jf. § 39 og § 62. Fremja av Klima- og miljødepartementet.

§ 1. Føremål

Føremålet med Dalsfjorden marine verneområde er å ta vare på ein særeigen, avskjerma og representativ fjord forma av innlandsisen sine utgravingar gjennom fleire istider., med spesielle straumtilhøve og ein uvanleg kombinasjon av stor ferskvasstilførsel og artsrike hardbotnsamfunn med eit nasjonalt verdfullt estuarområde inst i fjorden., og eit viktig oppvekst- og beiteområde for eit mangfald av marine artar.

Det er ei målsetjing å halde verneverdiane utan større grad av ytre påverknad, og området skal kunne tene som referanseområde for forskning og overvaking.

Verneføremålet knyter seg til vassøyla og sjøbotnen.

§ 2. Geografisk avgrensing

Grensene for det marine verneområdet går fram av kart datert Klima- og miljødepartementet februar 2026.

Det marine verneområdet dekker eit sjøareal på 10,7 km². Verneområdet har grense mot land langs djupnekote 2 m under sjøkartnull for heile området unntatt der:

- Grensene er trekt utanom hamner og annan infrastruktur.
- Vernet grenser inntil Osen naturreservat og Holmelidholmen naturreservat; det marine verneområdet har felles grense med disse naturreservata i sjø.
- Ved eigedomane nemnt i tredje ledd, der også landareal i tidevassona opp til middel høgvatn (normal flo) er inkludert.

Verneområdet femner om overflata, vassøyla og sjøbotnen.

Det marine verneområdet omfattar følgjande gnr./bnr.: 259/3 i Askvoll kommune, 52/1, 52/2, 53/1, 54/1, 55/1, 55/2, 56/1, 56/2, 56/3, 56/4, 56/5, 57/2 og 57/5 i Fjaler kommune og 230/1, 230/2, 230/3, 230/4, 230/5, 231/1, 231/2, 231/3, 231/5, 232/1, 232/3, 232/4, 232/6, 233/3, 233/4, 233/5, 233/13, 229/1, 229/2, 229/3, 229/5, 229/8, 222/5, 222/8, 222/14, 195/1, 195/3, 195/6, 195/10, 195/11, 193/1, 187/1, 187/2, 187/4, 187/5 og 187/6 i Sunnfjord kommune.

§ 3. Vernereglar

I det marine verneområdet må ingen setje i verk noko som skader verneverdiane nemnt i verneføremålet. Følgjande vernereglar gjeld:

- a) Vegetasjonen, medrekna tang, tare og andre marine planter, er verna mot skade og øydelegging. Planting av vegetasjon er forbode.
- b) Dyrelivet i sjø er verna mot skade og øydelegging. Utsetjing av organismar er forbode.
- c) Området er verna mot tiltak som t.d. etablering av ulike typar anlegg, utfylling, byggeverksemd, plassering av konstruksjonar på sjøbotnen, andre varige eller midlertidige innretningar, legging av røyrleidningar og kablar, utføring av avløpsvatn

og andre konsentrerte tilførsler av ureining, utslepp av ureinsa ballastvatn, mudring, uttak og deponering av masse, sprenging, boring, utslepp av kjølevatn frå land, omrøyring av vassmassar og ankring. Forsøpling er forbode.

§ 4. *Generelle unntak frå vernereglane*

Vernereglane i § 3 er ikkje til hinder for:

- a) Gjennomføring av militær operativ verksemd og tiltak i samband med ambulanse-, politi-, brannvern-, oljevern, rednings- og oppsynsverksemd (ikkje øvingsverksemd), samt gjennomføring av skjøtsel eller forvaltingsoppgåver som er bestemt av forvaltingsstyresmakta
- b) Anlegg av mindre fartøysfeste for småbåt, medrekna fastfortøying og dragfortøying. Fortøyingssmidde på faste fortøyingar må vere i stein eller anna materiale som ikkje forureina
- c) Ankring i område i Fossvika og Røvik som er markert i vernekartet, og ankring i samband med anløp ved eksisterande kai i Kvamen og på Skjeret i Bjørvika
- d) Hausting av villlevande marine ressursar i samsvar med havressurslova og anna gjeldande lovverk, med unntak for hausting av skjel og hausting av vegetasjon, medrekna tang, tare og andre marine planter
- e) Tradisjonell låssetjing av fisk
- f) Fiske i samsvar med lakse- og innlandsfiskloven
- g) Jakt og fangst i samsvar med andre lover og forskrifter
- h) Ferdsel med båt eller andre fartøy, og ankring mot land for småbåt
- i) Drift og vedlikehald av eksisterande sjømerke og andre navigasjonsinstallasjonar
- j) Drift og vedlikehald av eksisterande sjøkablar og naudsynte reparasjonar ved akutt utfall
- k) Drift og vedlikehald av andre eksisterande anlegg og innretingar.
- l) Oppgradering og fornying av eksisterande sjøkablar for å heve spenningsnivå og auke linetverrsnitt når dette ikkje føreset vesentlege fysiske endringar som ikkje er i samsvar med verneføremålet
- m) Vedlikehaldsmudring av kanal til båtstø og naust

§ 5. *Spesifiserte dispensasjonsreglar*

Forvaltingsstyresmakta kan etter søknad gje dispensasjon til:

- a) Oppføring av naudsynte navigasjonsinstallasjonar og andre farleistiltak for å trygge ferdsla til sjøs
- b) Legging av kablar og røyrleidningar, så langt som mogleg samla i korridorar
- c) Oppgradering og fornying av sjøkablar som ikkje fell inn under § 4
- d) Tilretteleggingstiltak for friluftsliv
- e) Småbåtanlegg medrekna m.a. flytebrygger og fortøyingar
- f) Bølgjedemparar i samband med småbåtanlegg
- g) Tekniske tiltak som inneberer små inngrep på botnen og som ikkje påverkar dei marine verneverdiane inkl. vassutskifting og straumforhold nemneverdig
- h) Ankring av båt eller andre fartøy større enn 15 meter
- i) Tiltak i grunne område for å betre tilkomst med båt, som mudring framfor naust og båtøpprekk
- j) Istandsetting, skjøtsel og vedlikehald av kulturminne
- k) Akvakultur som ikkje er i strid med verneføremålet
- l) Levandelagring av villfanga fisk inntil 12 veker
- m) Legging av nye avlaupsleidningar og utslepp av reinska kloakk
- n) Uttak av framande, introduserte artar.

- o) Mindre uttak av sand til eige bruk for grunneigar
- p) Utviding av eksisterande tømmerkai i Kvamen
- q) Mindre tiltak i samband med oppgradering av Fv. 57 langs Dalsfjorden

§ 6. *Generelle dispensasjonsreglar*

Forvaltingsstyresmakta kan gjere unntak frå forskrifta om det ikkje er i strid mot føremålet til vernevedtaket og ikkje kan påverka verneverdiane nemneverdig, eller dersom tryggleikssyn eller omsyn til vesentlege samfunnsinteresser gjer det naudsynt, jf. naturmangfoldloven § 48.

§ 7. *Skjøtsel*

Forvaltingsstyresmakta, eller den forvaltingsstyresmakta bestemmer, kan setje i verk tiltak for å oppretthalde eller oppnå den naturtilstanden som er føremålet med vernet, jf. naturmangfoldloven § 47.

§ 8. *Forvaltingsplan*

Forvaltingsstyresmakta skal utarbeide ein forvaltingsplan med nærare retningslinjer for forvalting og skjøtsel av det marine verneområdet. Forvaltingsplanen kan innehalde nærare retningslinjer for gjennomføring av skjøtsel.

§ 9. *Forvaltingsstyresmakt*

Statsforvaltaren er forvaltingsstyresmakt etter denne forskrifta.

§10. *Rådgjevande utval*

Det kan opprettast eit rådgjevande utval for forvaltinga av verneområdet.

§ 11. *Iverksetjing*

Denne forskrifta tek til å gjelde straks.